

E benanan di nos Pais

ORANJESTAD (AAN): Ta conoci pa grandi y chikito na Aruba cu na Maart 1824 Willem Rasmijn a yega cas y a muestra su tata Jaco un "kiniki briyante" cu el a haya den Rooi Fluit. E resto di e storia di Willem, su tata y e "kiniki" ta parti importante di historia di Aruba.

Loke Willem a haya e dia ey

den Rooi Fluit tabata un pida oro y despues cu a bira conoci cu tin oro na Aruba a piki esaki for di e asina yama "deposito aluvial". E oro aki ta esun cu ta los for di e piedra caminda e ta forma cu yobida ta bay pega den klei y lodo den e rooinan.

Aruba a cuminsa forma mas di 95 miyon aña pasa for di

actividad volcanico cu a produci e piedranan cu awe nos por wak den sercania di Yamanota, costa norte y Dos Playa. E conhunto di piedranan aki cu nos ta yama "Aruba Lava Formation". E formacion di piedranan aki despues a worde penetra pa material di magma mas of menos 10 miyon aña despues

di su formacion. E intrusion aki, manera e fenomeno aki ta worde yama, a produci diferente "gang" of bena. Un di e piedranan cu a cristaliza den e benanan aki ta quartz y den e quartz ta caminda e oro tambe a forma. Quartz ta ser yama na Aruba "piedra di speki" probablemente pa e color caracteristico blanco cu

e tin. E benanan den paisahe di Aruba ta visibel e.o. na Tibushi, Arikok y Miralamar.

Despues cu e cantidad di oro den e deposito aluvial a mengua a bay na mina e oro for di e benanan mes. Companianan manera Aruba Gold Concessions y Aruba Gold Mines Operating Co. a saca un cantidad basta grandi di oro for di e benanan di quartz. E mina di mas productivo na Aruba tabata esun "Mil Speranza" na Miralamar cerca di Yamanota. E gangnan di e mina tabata bay te hasta 300m den tera. Aki den trahadornan tabata los e piedra di quartz cu pik pa despues e worde transporta pa superficie. Una vez cu e ta na superficie e piedra tabata worde transporta via kitrinchi, un sorto di wagon di trein pa e "smelterij" na Balashi.

E proceso pa saca e oro for di den e quartz tabata door di mula e quartz fini cu mulina pa despues trata e quartz cu cyanide pa laba e piedra for di e mineral precioso. Esaki tabata tuma luga na Balashi y na Bushiribana. Despues di a saca oro na valor di mas o menos 2 miyon Florin hulandes a bandona e minanan cu ya no tabata duna suficiente oro pa ta rendabel.

Awendia e benanan di quartz ta parce strepinan blanco den e paisahe y ora bo yega cerca bo ta wak e piedra tur kibra. Minanan bieu na Miralamar ainda ta duna un impresion di e actividad cu a worde efectua den esakinan.

Informacion compila pa e articulo aki ta for di diferente fuente. Publico hopi biaha no ta conoci of custumbra pa usa nos centronan di documentacion pa haya informacion di historia cultural y natural. E centro di mas importante ta Biblioteca Nacional, Seccion Arubiana y Caribiana. Otro centronan di documentacion ta e Museonan, Archivo Historico Nacional y Bibliotecanan di Parke Nacional y Santa Rosa. Haci uso di nos centronan di documentacion, e riqueza di nos pais ta warda den esakinan.